

近代中國史料叢刊分類選輯
沈雲龍教授選編

甲集：奏議、奏疏、疏稿類

滇黔奏議

劉嶽昭著

文海出版社
有限公司
印行

滇黔奏議卷六

湘鄉劉嶽昭盡臣著

男錫楚謹編

奏報官軍援剿普安立解城圍摺子

同治八年七月

奏爲官軍援救普安剿賊大勝立解城圍恭摺具報仰
祈

聖鑒事竊照滇黔毗連之普安廳於本年四月內被新城
逆匪勾結甘逆嚴大五等率黨萬眾圍撲城池經署
同知吳宗蘭會同營員督率紳練晝夜登陣竭力固
守臣疊據稟報飛咨貴州撫臣曾璧光調兵會剿並
飭署興義府知府葉正邦護興義營游擊劉官德都

司包於蓮等先往援救署平彝縣事候補知州文鴻盛一聞警報卽派軍功楊德溥帶練一千名籌給經費馳往堵擊臣於克復尋甸州城後勉力抽派副將張松林都司劉奇義各帶所部勇丁又檄知縣任傳綸沿途號召鄉練聯絡聲勢以期迅解城圍其邊境守禦事宜文鴻盛派令增生張旭中妥爲布置均經奏明在案六月初十日張松林劉奇義任傳綸等帶隊到普貴州撫臣所派之署安義鎮總兵楊發貴副將池有蓮參將楊得勝趙明清等亦先後抵境與前署同知吳宗蘭接署同知李斌等會商附城之劉官生

陸官里老官里老巴里支家里稽家里等處賊營三十餘處其地險賊悍者又麇聚於高家里晝則羣伏不動夜則四出環攻最爲兇狡該文武等審察形勢必須先破堅巢其餘自應瓦解十一日黎明先令鄉練作爲嚮導布列山下賊皆守寨不出從山頂施放鎗礮居高禦下多被擊傷鄉練佯敗退走賊卽大隊追出誘至平地張松林劉奇義先派兩路奮勇從山後攀援而上各路兵練正與支家里陸官里等處踞匪接仗賊勢彼此不顧張松林劉奇義與賊鏖戰兩時之久斃賊數百人後山之軍已用火箭射燃里內

賊棚當卽驚亂我軍直追上山張松林劉奇義首先衝入寨頂各軍自陸官垵老巴垵稽家垵等處掃蕩而前四面圍攻斃賊一千餘人生擒一百三十餘人斬於陣前其墮巖落澗者無算賊遂狂奔我軍追至輓橋哨有劉官垵支家垵潰匪從旁竄出經張松林等登時擊散葉正邦楊發貴督同守備董懷經軍功鍾占魁李紹唐亦各分路窮追至普安縣屬之江西坡地方距廳城已一百三十餘里敗賊散走無蹤探係爬山越嶺竄歸新城老巢惟該處賊踞十有餘年非倉猝所能深入且道路已成荆棘無地可辦米糧

不得不暫行收隊其普安縣城經游擊易飛熊署知縣牟謙篤帶領兵團併力防剿廳屬之坎者古德冷風口一帶賊壘十餘處先後被都司包於蓮守備孫承忠等攻克擒斬甚多四至地面復經吳宗蘭李斌等周歷搜捕現均一律肅清由該文武具稟到臣臣查新城賊匪勢極披猖圍困普安已踰三月如令其盤踞蔓延實爲兩省邊患所幸該地方文武齊心堅守赴援各軍雖當糧餉兩絀俱能奮勇爭先臣揀派之副將張松林都司劉奇義知縣任傳綸等取道平彝由亦資孔捷徑星夜奔馳到境喘息未停卽能會

軍剿賊立解重圍城中十餘萬生靈咸有再生之慶
辦理尙合機宜所有在事尤爲出力之文武紳團兵
勇臣已查明隨摺開具清單恭呈

御覽合無仰懇

恩施以示鼓勵出自格外

鴻慈除將張松林劉奇義等營札調回曲仍飭楊發貴葉
正邦劉官德等乘勝進攻新城賊巢並查明傷亡兵
勇彙案辦理其黔省紳團另由貴州撫臣覈獎外所
有官軍援剿普安立解城圍各緣由理合繕摺由驛
馳陳伏乞

皇太后

皇上聖鑒訓示謹

奏

軍機大臣奉

旨另有旨欽此

附奏分別漢回解散脅從並親赴省垣派諸將合剿
迅解城圍片子

再省圍未解臣前飭昭通鎮總兵李家福督同總兵
鍾福俊王維金吳奇忠等各率所部開拔赴省與撫
臣提臣會籌攻剿頃據該鎮稟報省軍進規祿豐易
門安甯昆陽新興等州縣附城賊壘負固如常我軍
現紮南門之大梵宮三節橋田壩等處現擬截斷該
逆糧路即可會攻江右館一帶巨巢又飭馬天順帶
領民兵五百名赴省由提臣調遣令其立功贖罪臣
接據普安解圍之捷即擬將張松林劉奇義等營調

回親帶赴省適接署昭通鎮全祖凱及各委員等稟
稱回眾實係紮營自固漢民意在報仇必欲剿回提
臣唐友耕因漢民阻止尙無拔營援省確期等情臣
以昭魯之事本起於奸匪浮言其中附和者眾如不
分別重輕權宜辦理非特宣威威甯等處羣起驚疑
鋌而走險且恐三迤安分之回聞風生變實於大局
有關臣與撫臣提臣出示曉諭並飭全祖凱會同該
地方文武嚴拏滋事首犯設法解散脅從先行保護
漢民村寨免其藉口又密飭東川府孔昭鈐體察實
在情形再行酌辦統俟稍有端倪臣卽馳赴會垣與

撫臣提臣通籌全局庶咽喉無梗阻之虞肘腋無倉猝之變至道員劉嶽曙所部前經

奏明駐紮尋甸馬龍各隘所有尋甸善後事宜漸有條理現派該道之後軍提督胡志祺副將王蔭南李志高黃正久等四營馳赴省垣與李家福等合力會剿以期迅解城圍惟臣進省在即東路漸覺空虛隨處宜防緩急仍飭該部酌留數營擇要分布以壯聲威而期周密爲此附片陳伏乞

聖鑒謹

奏

軍機大臣奉

旨另有旨欽此

奏陳昭魯回務情形並起程赴省日期摺子

同治八年八月

奏爲昭魯回務委員相機辦理臣卽馳赴省垣恭摺仰

祈

聖鑒事竊查昭通魯甸漢回本係雜居遇事每生嫌隙自
同治五年剿辦馬富貴等之後地方漸就肅清上年
西逆大股下竄省城危急該處回民頗臻安貼東路
餉源賴以無阻本年四月內提督唐友耕自川帶兵
來援將次入境忽有昭通奸匪播散流言傳稱唐友
耕先滅昭通一帶回人再行進省唐友耕原籍昭通
大關廳人所部名爲川軍實俱演練其中游手無賴

之徒在所不免昭通民本强悍增以唐軍六千之眾
遂有恃而不恐其以復仇爲辭齊赴昭通府恩安縣
衙門關關請畱援軍先辦昭回於是魯甸威甯各處
回民聞風據險疊出剽掠東昭大路遂多梗塞疊據
該文武據情轉稟並准唐友耕咨商前來臣查漢回
不和本非始於今日而川軍援剿事莫重於省城當
經咨請唐友耕拔營前進一面出示剴切曉諭並飭
署昭通鎮全祖凱楚雄府知府吳春然馳往體察情
形保護漢民村寨並嚴拏爲首滋事唆使之人懲儆
了事以冀保全完善詎料全祖凱到後唐軍已與昭

魯回眾接仗數次互有損傷全祖凱暫就龍寶山要
路紮營長寨五里坳魚脊等回復來攻撲立經擊退
陣亡額外錢忠祿一名以眼前情形而論言撫則唐
華固結已不可解漢人之勢有若燎原言剿則昭魯
本來無事之區一變而爲鋒鏑則餉道釐金在在堪
虞全滇命脈將有不堪思議者且此次回民李本忠
等紮營自固始因滅回之謠繼求自全之計與他處
公然叛逆者本有不同臣與撫臣提臣往復函商意
見相合現經咨請四川將軍臣崇實總督臣吳棠催
令唐友耕迅卽拔隊援省毋爲浮言所動逗遛昭通